


Roald Dahl

NY THOOTYN



Caslyssaght liorish

Quentin Blake

Lioaryn Pibbin



Eddinyn Geayshteenagh



Lheid y towse dy gheiney t'ayn as eddinyn geayshteenagh oc ny laghyn shoh.

Tra ta dooinney as eddin lane-gheayshteenagh ayn, cha nod oo cur enn er dy kiart.

Foddee dy vel shen yn oyr. Bare lesh nagh row enn ayd er.

Eisht she'n feysht t'ayn bentyn rish niee.

Tra t'adsyn feer gheayshteenagh niee ny eddinyn oc, s'cosoylagh eh dy vel shen job cho mooar as tra t'ou uss as mish oonlaghey nyn ging.

Myr shen by vie lhiam toiggal shoh. Cre vennick ta deiney ny eddinyn geayshteenagh shoh niee nyn eddinyn? Nee un cheayrt 'sy çhiaghtin eh, gollrooinyn, oie Jedoonee? As vel ad jannoo ymmyd jeh shampoo? Vel ad gymmydey çheereyder fuilt? Vel ad rubbey stiagh stoo slaynt dy chur stap er nyn eddinyn çheet dy ve meayll? Vel ad goll gys folteyder dy ghiaarray as dy yeshaghey nyn eddinyn geayshteenagh ny vel ad jannoo eh ad hene roish gless huarystal 'sy çhamyr oonlee lesh shuddyryn ingyey?

Cha s'ayms. Agh y nah cheayrt t'ou fakinn dooinney as eddin gheayshteenagh echey (as s'cosoylagh eh dy bee shen cho Leah's t'ou cur cass magh er y traid) foddee dy jean oo jeeaghyn er ny s'gyerey as goaill toshiaght er gindys mychione kuse jeh ny cooishyn shoh.



Mnr Thoot

Va Mnr Thoot fer jeh ny deiney shoh as eddinyn feer gheayshteenagh oc. Va'n clane eddin echey, er-lhimmey jeh e vaaish as e hooillyn as e troin, coodit lesh geayshteenyn garroo. Va'n stoo eer stholey magh ayns tappagyn feohdagh ass tuill ny stroaney as ny cleayshyn echey.

Va Mnr Thoot gennaghtyn dy row yn geayshteenid shoh cur ersyn jeeaghyn feer chreeney as stoamey. Agh ayns furrinys cha row eh yn derrey yeh ny'n jeh elley. She thoot va Mnr Thoot. V'eh ruggit ny hoot. As nish ec sheyad blein dy eash, v'eh ny hoot smoo na v'eh rieu.

Cha row ny geayshteenyn er eddin Mnr Thoot gaase dy rea as pollit 'syn aght t'ad gaase er

deiney elley as eddinyn geayshteenagh oc. V'ad gaase ayns tappagyn va nyn shassoo jeeragh gollrish ny friogganyn jeh skeaban ingney.

As cre vennick va Mnr Thoot niee yn eddin riogganagh skeaban-ingney-agh shoh v'echey?

RIEAU, shen yn ansoor, eer Jedoonee.

Cha row eh nieet echey rish bleeantyn.

Faasaagyn Sollagh

Myr ta fys ayd, ta eddin chadjin gyn geayshteenid gollrish yn fer ayds as ayms cheet dy ve jus beggan smearit mannagh vel ee goll er niee mennick dy liooar, as cha nel veg ro agglagh mychione shen.

Agh s'feer anchasley eh rish eddin gheayshteenagh. Ta reddyn *greimmey* geayshteenyn, as bee er-lheh. Ta reddyn gollrish aunlyn sheeley stiagh mastey ny geayshteenyn as t'ad tannaghtyn aynshen. Foddee uss as mish glenney nyn eddinyn rea lesh clooid oonlee as dy Leah ta shin jeeaghyn kiart reesht, fo ny harrish, agh cha nod yn dooinney geayshteenagh jannoo shen.


Fodmayd neesht, my vees shin kiarailagh, ee ny lhongaghyn ain gyn skeaylley bee ooilley mygeayrt nyn eddinyn. Agh cha nee myr shen eh lesh yn dooinney geayshteenagh. Jeeagh dy kiarailagh yn nah cheayrt t'ou fakin dooinney geayshteenagh gee yn kirbyl ehey, as yiw uss tastey, eer my vees eh fosley yn beal ehey feer lhan, nagh nod eh cur lane-spein dy vroish feill vart ny dy chey riojey as soolagh shocklaid stiagh ayn gyn faagail paart jeh er ny geayshteenyn.

Cha row Mnr Thoot boirey e chione mychione fosley e veal dy lhan tra v'eh gee. Myr eiyrtys (as er yn oyr nagh ren eh rieu oonlaghey) va dy kinjagh keeadyn dy veeryn jeh shenn



anjealyn as kirbil as shibberyn lhiantyn rish ny geayshteenyn mygeayrt yn eddin ehey. Cha row ad nyn meeryn mooarey, t'ou toiggal, er yn oyr dy jinnagh eh skeabey ersooyl adsyn lesh cooyl y duirn ehey ny lesh e vuinneel choud's v'eh gee. Agh dy beagh caa dhyt jeeaghyn dy gyere (ga nagh beagh oo gearree jannoo shen), yinnagh oo fakin cronny beggey peeogeagh jeh oohyn bwoailt çhirmit lhiantyn rish ny geayshteenyn, as blennican as soolagh traase as meir east as aaneyn kirkey myn-ghiarrit as dagh ooilley horçh dy nhee feodagh by vie lesh Mnr Thoot ee.

Dy beagh oo jeeaghyn eer ny s'gyerey (cur greim er dty stroin, shen my choyrle dhyt, charrey veen), dy beagh oo blakey dy down mastey ny friogganyn farveelagh ta nyn shassoo magh veih erskyn yn veill s'yrjey ehey, s'cosoylagh eh dy jinnagh oo fakin reddyn foddey smoo ren cur shaghey skeab e laue, reddyn va aynshen rish



meeghyn as meeghyn, gollrish meer dy chaashey glass crooagagh ny shenn lhiannag arroo er lheeah ny eer yn famman gleiynagh jeh sardeen stainnit.

Er coontey jeh shoh oilley, cha row rieu accrys feer er Mnr Thoot. Liorish cur magh e hengey as cassey eh gys y çheu dy ronsaghey yn doofyr geayshteenagh mygeayrt y veeal echey, oddagh eh dy kinjagh feddyn foillagh blasstal noon as noal dy huilgey.

Ny by vie lhiam insh dhyt, va Mnr Thoot ny henn dooinney graney breinn.

Veh ny ghoiney feer neughennal neesht, myr yiw uss magh ayns shallid.

Bnr Thoot

Cha row Bnr Thoot ny share na'n dooinney sheshey eck.

Cha row eck, dy dooghyssagh, eddin gheayshteenagh. S'bastagh nagh row er yn oyr dy jinnagh shen, ec y chooid sloo, er cheiltyn beggan jeh'n ghranid agglagh va jannoo urree.

Jus jeeagh urree.




Vel uss rieu er nakin ben as eddin ny s'graney eck na shen? S'cosoylagh eh nagh vel.

Agh s'quaagh eh, cha row Bnr Thoot ruggit as ish graney. Va eddin yesh dy liooar eck tra v'ee aeg. Va'n granid er jeet urree blein lurg blein choud's haink ee dy ve ny shinney.

Cre'n fa veagh shen taghyrt? Nee'm insh dhyt yn oyr.

My vees smoinaghtyn graney ec peiagh

ennagh, ta'n eddin goaill toshiaght er soilshaghey magh shen. As tra ta smooïnaghtyn graney ec y pheiaagh shen dagh laa, dagh shiaghtin, dagh blein, ta'n eddin cheet dy ve ny s'graney as ny s'graney derrey vees ee cho graney, s'goan foddee oo jeeaghyn urree.



Cha nod peiaagh ennagh ve graney my ta smooïnaghtyn mie echey ny eck.



Foddee dy vel stroin whaagh as beel cam as smeggyl ghooblit as cor-eeacklyn ayd, agh my vees smooïnaghtyn mie ayd nee adsyn soilshean magh ass dty eddin gollrish scellyn greiney as bee cummey aalin ort son dy bragh.

Cha row veg soilshean magh ass eddin Vnr Thoot.

Ayns e laue yesh v'ee gymmyrkey maidjey shooyl. She'n cliaghtey va eck dy insh da sleih dy row shoh er yn oyr dy row fahnaghyn gaase fo trie e coshey chiare as dy re gonnagh jee va shooyl. Agh yn oyr firrinagh v'ee gymmyrkey maidjey, shen dy voddagh ee bwoalley reddyn lesh, reddyn gollrish moddee as kiyt as paitçhyn begghey.

As eisht, yn tooill ghlonney. Va sooill ghlonney ec Bnr Thoot va dy kinjagh jeeaghyn y raad elley.



Yn Tooill Ghlonney

Foddee oo jannoo ymmodee cluicyn lesh sooill ghlonney er yn oyr dy vod oo goaill magh ee as cur stiagh ee reesht traa erbee t'ou gearree. Foddee oo cur barrant er dy row fys ec Bnr Thoot er ooilley ny cluicyn.

Moghrey dy row ghow ee magh e sooill ghlonney as huitt ee ee 'sy veddyr dy lhune ec Mnr Thoot tra nagh row eh goaill tasteey.

Va Mnr Thoot ny hoie as eh giu yn lhune dy moal. Daag yn chesh kiarkyl bane er ny geayshteenyn mygeayrt e veeal. Ren eh rubbey yn chesh vane er y vuinneel echey as ren eh rubbey e vuinneel er ny troosyn echey.

'Te foyd jannoo cluic ennagh,' as Bnr Twit, as e dreeym da nagh jinnagh eh fakin dy row ee er ngoaill magh e sooill ghlonney. 'Traa erbee t'ou cheet dy ve dy slane tostagh myr shen ta fys aym dy vel eh foyd jannoo cluic ennagh.'

Va Bnr Thoot kiart. Va Mnr Thoot smooinghyn dy creoi dy chummeey cluic. V'eh cur eab er cummeey cluic feer neughennal dy voddagh eh jannoo er e ven y laa shen.

'Shegin dhyt ve kiarailagh,' as Bnr Thoot, 'er yn oyr dy vel mish, tra ta mee fakin oo goaill toshiaght er cummeey cluic, jeeaghyn dy gyere ort gollrish wombat.'



'Oh, cum dty hengey, henn chaillagh uss,' as Mnr Thoot. Hie eh er lesh iu yn lhune echey, as va ny inçhyn olk echey goll er lesh yn chluic s'noa neughennal v'eh er-çhee jannoo er y çhenn ven.

Doaltattym, choud's va Mnr Thoot deayrtey yn bine s'jerree jeh'n yough sheese yn ahjioogh echey, honnick eh sooill ghlonney agglagh Vnr Thoot blakey neese er veih bun y veddyr. Hug ee ersyn clistal.

'Dinsh mee dhyt dy row mee jeeaghyn ort,' ren

Bnr Thoot garaghtee. 'Ta ny sooilyn aym ayns dagh ooilley voayl myr shen shegin dhyt ve kiarailagh.'



Yn Rannag

Dy ghoaill coilleen urree er coontey jeh'n tooill ghlonney ayns y lhune echey, ve fo Mnr Thoot cur rannag ayns lhiabbee Vnr Thoot.

Hayr eh fer mooar heese liorish y loghan as dymmyrk eh back eh dy follit ayns kishtey.

Yn oie shen, tra va Bnr Thoot 'sy chamyr oonlee jannoo aarloo dy gholl dy lhie, ren Mnr Thoot cur stiagh yn rannag eddyr ny brelleeinyn eck. Eisht ghrapp eh stiagh 'sy lhiabbee echey hene as v'eh fuirraghtyn er yn aittys goaill toshiaght.

Haink Bnr Thoot er-ash as ghrapp ee stiagh 'sy lhiabbee eck as voogh ee yn chressad. V'ee ny lhie aynshen 'sy dorraghys, as ish screebey yn pell eck. Va'n pell eck taghyssagh. Ta dy kinjagh pellyn taghyssagh ec shenn chailleeyn sollagh gollreeish.

Eisht dy doaltattymagh dennee ee red ennagh feayr as gleiynagh snaue harrish ny cassyn eck. Ren ee screeaghey.

'C' red ta jannoo ort?' as Mnr Thoot.

'Cooïn lhiam!' dyllee Bnr Thoot, as ish clistal mygeayrt. 'Ta red ennagh 'sy lhiabbee aym!'

'My phing yerrinagh er, she'n Skilleewiggleyr Foawragh eh honnick mee er y laare kiart nish,' as Mnr Thoot.

'Cre va shen?' ren Bnr Thoot screeaghey.

'Hug mee eab er marroo eh, agh ren eh scapail,' as Mnr Thoot. 'Ta feeackleyn echey gollrish

scrodeyryn!

'Cooïn lhiam!' as Bnr Thoot lesh screeagh.

'Cooïn lhiam! T'eh ooilley mygeayrt ny cassyn aym!'

'Nee eh greimmey jeed meir dty chassyn,' as Mnr Thoot.




Huitt Bnr Thoot neel.

Dirree Mnr Thoot magh ass e lhiabbee as hug eh lesh podjal dy ushtey feayr. Ren eh deayrtey yn ushtey harrish kione Bnr Thoot dy aavioghey ee. Ren yn rannag snaue neese veih fo ny brelleeïnyn dy heet faggys da'n ushtey. Ghow eh toshiaght er lheimmey mygeayrt er y chlooiesag. Shynney lesh rannagyn ushtey. Va traa taitnyssagh ec yn er shoh.

Tra haink Bnr Thoot huick hene reesht, va'n rannag kiart er lheimmey er yn eddin eck. Cha

nee taghyrt mie shen da peiagh ennagh 'sy lhiabbee oc er yn oie. Ren ee screeaghey reesht.



'Shee bannee mee, she Skilleewiggleyr Foawragh t'ayn *dy jarroo!*' as Mnr Thoot. 'Nee eh greimmey jeed dty stroin.'

Ren Bnr Thoot lheimmey magh ass y lhiabbee as roie ee sheese ny greeishyn. Ren ee ceau yn oie er yn aashag. Hie yn rannag dy chadley er y chlooiesag eck.



Ny Spaghetti Dhianeagh

Yn laa er-giyn, dy ghoaill coilleen er Mnr Thoot er coontey jeh'n chluic lesh y rannag, ren Bnr Thoot snaue magh gys y gharey as ren ee reuyrey neese kuse dy ghianeyn. Ren ee reih fir liauyrey vooarey as hug ee ad ayns staineey as dymmyrk ee yn staineey back gys y thie fo'n apyrn eck.



Ec 'nane er y chlag, ren ee coagyrey spaghetti son kirbyl as ren ee seiy stiagh ny dhianeyn mastey ny spaghetti, agh er claare e dooinney sheshey ynrican. Cha row ny dhianeyn ry-akin er yn oyr dy row dagh ooilley red coodit lesh sooslagh traase as skeaylt harrish lesh caashey.

'Hoi, ta'n spaghetti aym gleashaghey!' deam Mnr Thoot, cur brod ny mast'oc lesh yn aal echey.

'Sorçh noa ad,' as Bnr Thoot, goaill lane beal veih'n chlaare eck, ny mast'oc, dy dooghyssagh,

nagh row dhiane erbee. 'T'ad enmyssit Spaghetti Sprangagh. S'blasstal ad. Slug sheese ad choud's t'ad çeh dy liooar.'

Ghow Mnr Thoot toshiaght er ee, cassey ny strengyn liauyrey coodit lesh ooyllyn graih mygeayrt yn aal echey as sleaystey ad stiagh 'sy veeal echey. Dy Leah va sooslagh traase ooilley harrish yn smeggyl gheayshteenagh echey.

'Cha nel ad cho mie as yn sorçh cadjin,' as eshyn, as eh loayrt trooid lane beal echey. 'T'ad ro vog.'

'Er-lhiams dy vel ad feer vlasstal,' as Bnr Thoot. V'ee jeeaghyn ersyn veih kione elley yn voayrd. Hug eh taitnys mooar urree, fakin eh gee dhianeyn.

'Dooy's, t'ad beggan sharroo,' as Mnr Thoot. 'Ta blass sharroo er-lheh oc. Kionnee yn sorçh elley yn nah cheayrt.'



Duirree Bnr Thoot derrey va Mnr Thoot er nee ooilley v'er y chlaare echey. Eisht dooyrt ee, 'By vie lhiat feddyn magh yn oyr dy row ny spaghetti ayd ro vog?'

Ren Mnr Thoot rubbey yn sooslagh traase
veih'n aasaag echey lesh lent yn aanrit buird.
'Cre'n oyr?' as eshyn.

'As yn oyr va drogh vlass sharroo orroo?'

'Cre'n oyr?' as eshyn.

'Er yn oyr dy re *dhianeyn* v'ayn!' dyllee Bnr
Thoot, lesh bwoalley bass as sathampey cass as ish
er creau lesh garaghtee atçhimagh.



Yn Maidjey Shooyl Quaagh

Dy ghoail cooilleen er Bnr Thoot er coontey jeh
ny dhianeyn mastey ny spaghetti echey, ren Mnr
Thoot cummey cluig neughennal feer ahtal.

Oie dy row, tra va'n çhenn ven ny cadley, ren
eh snaue sheese ny greeishyn as ghow eh y
maidjey shooyl eck heese gys yn waane obbree
echey. Aynshen ren eh festal meer runt
peeogeagh foiee (nagh row ny s'chee na ping) er
bun yn vaidjey.

Myr shen va'n maidjey jeant ny s'lhiurey, agh
va'n anchaslys cho beg, y moghrey er-giyn, cha
ren Bnr Thoot goail tastey jeh.

Yn oie er-giyn, ren Mnr Thoot festal meer

peeogeagh foiee elley. Dagh oie, yinnagh eh snaue sheese ny greeishyn as hug eh çhiuid peeogeagh foiee elley da saayl yn vaidjey shooyl. Ren eh job feer jesh dy row ny meeryn elley jeeaghyn gollrish aynr jeh'n vaidjey shooyl.

Ny veggan as ny veggan as ny eer eer veggan va maidjey shooyl Bnr Thoot çheet dy ve ny s'lhiurey as ny s'lhiurey.

Agh tra ta red ennagh gaase feer voal, s'goan foddee peiagh ennagh cur tastey dy vel eh taghyrt. Uss, myr hampleyr, dy firrinagh t'ou uss gaase ny s'yrjey dagh laa ta goll shaghey, agh cha nee shen myr t'ou smooïnaghtyn, nee? T'eh taghyrt cho moal nagh nod oo goaill tastey jeh veih'n derrey hiaghtin gys y çhiaghtin elley.

She'n red cheddin v'ayn bentyn rish maidjey shooyl Bnr Thoot. Cho moal ve, ny veggan as ny veggan, nagh ghow ee tastey jeh cre cho liauyr v'eh çheet dy ve eer tra v'eh lieh-raad da'n gheaylin eck.

'Ta'n maidjey shen ro liauyr er-dty-hon,' dooyrt Mnr Thoot r'ee laa dy row.

'Dy jarroo t'eh!' as Bnr Thoot, choud's v'ee jeeaghyn er y vaidjey. 'Va mee gennaghtyn dy row red ennagh neuchiart ayn agh cha dod mee er m'annym smooïnaghtyn er yn oyr jeh.'

'Ta red ennagh neuchiart ayn, kiart dy liooar,' as Mnr Thoot, as eh goaill toshiaght er goaill taitnys.

'Cre *oddys* er daghyrt?' as Bnr Thoot, blakey er

y vaidjey shooyl. 'T'eh er naase ny s'lhiurey dy doaltattymagh, gyn ourys.'



'Ny bee dty ommidan!' as Mnr Thoot. 'Cre'n aght er chor erbee oddagh maidjey shooyl gaase ny s'lhiurey? T'eh jeant ass foiee marroo, nagh vel? Cha nod foiee marroo gaase.'

'Eisht cre 'sy theihll t'er daghyrt?' deie Bnr Thoot.

'Cha nee yn maidjey eh, she *uss* ta moir y voirey!' as Mnr Thoot, lesh mongey neughennal. 'She *uss* ta çheet dy ve *ny s'girrey*! Ta mee er ve goaill tastey jeh rish tammylt nish.'

'Cha nel shen kiart!' deie Bnr Thoot.

'T'ou uss cribbey, ven!' as Mnr Thoot.

'Cha nod shen ve myr te!'

'Oh fod, as shen myr te,' as Mnr Thoot. 'T'ou cribbey dy tappee! She bieauid *danjeyragh* eh, yn aght t'ou goll er cribbey! Var-a-mish, s'cosoylagh

eh dy vel oo er chribbey liorish trie ayns laa ny ghaa ta jus er ngoll shaghey!

‘Cha nel!’ deie ee.

‘Dy jarroo, ta! Jeeagh er dty vaidjey, henn chaillagh myr t’ou, as jeeagh er yn towse t’ou er chribbey cosoylit rish shen! Ta ny *cribbaghyn* ayds, shen ta jannoo ort! Ta ny cribbaghyn *agglagh* jannoo ort!’

Ghow Bnr Thoot toshiaght er gennaghtyn ooilley er creau as begin jee soie sheese.



Ta ny Cribbaghyn Jannoo er Bnr Thoot

Cho Leah as hoie Bnr Thoot sheese, ren Mnr Thoot sheeyney magh e vair urree as dyllee eh, ‘Jeeagh er shen! T’ou uss dty hoie ayns dty henn chaayr as wheesh t’ou er chribbey nagh vel dty chassyn eer bentyn rish y laare!’

Yeeagh Bnr Thoot sheese er ny cassyn eck as dy jarroo va’n dooinney kiart. Cha row ny cassyn eck bentyn rish y laare.

Va Mnr Thoot, t’ou toiggal, er ve kiart cho aghtal lesh y chaayr as v’eh lesh y vaidjey shooyl. Dagh oie tra v’eh er ngoll sheese ny greeishyn as er vestal meer beg elley er y vaidjey shooyl, v’eh er nyannoo yn red cheddin lesh ny kiare cassyn jeh caayr Vnr Thoot.

‘Jus jeeagh orts dty hoie ayns dty henn chaayr chadjin,’ deie eh, ‘as wheesh t’ou er chribbey dy vel dty chassyn croghey ’syn aer!’

Haink Bnr Thoot dy ve glass neealagh lesh aggle.

‘Ta ny *cribbaghyn* ayds!’ dyllee Mnr Thoot, jeeraghey e vair urree gollrish gunn laue. ‘T’ad ayds dy agglagh! Ta’n case ayds jeh ny cribbaghyn ny s’messey na honnick mee rieau!’

Haink Bnr Thoot dy ve cho agglit dy ghow ee toshiaght er sheeley. Agh ec Mnr Thoot, va foast cur cooinaghtyn er ny dhianeyn mastey ny spaghetti echey, cha row erreesh echey urree er chor erbee. ‘Ta mee sheiltyn dy vel fys ayd er ny

ta *jannoo* ort tra ta ny cribbaghyn ayds?' as eshyn.

'Cre?' as Bnr Thoot lesh scred. 'Cre ta jannoo er sleih?'

'Ta dty chione CRIBBEY stiagh ayns dty wannal . . .

'As ta dty wannal CRIBBEY stiagh ayns dty chorp . . .

'As ta dty chorp CRIBBEY stiagh ayns dty lurgaghyn . . .

'As ta dty lurgaghyn CRIBBEY stiagh ayns dty chassyn. As fy yerrey hoal cha nel veg jeed faagit er-lhimmey jeh piyr dy vraagyn as bart dy henn eaddeeyn.'

'Cha noddym jannoo lesh!' deie Bnr Thoot.

'S'agglagh yn doghan eh,' as Mnr Thoot. 'Yn fer s'messey 'sy theihll.'

'Cre chouds t'ayms?' deie Bnr Thoot. 'Cre chouds roish dou cheet gy kione myr bart dy henn eaddeeyn as piyr dy vraagyn?'

Hug Mnr Thoot ersyn eddin hrome-chooishagh. 'Ec yn Leahys t'ou goll,' as eshyn, craa e chione dy trimshagh, 'yiarrins nagh bee ny shlee na jaih laghyn ny un laa jeig er mayrn jeed.'

'Agh nagh vel *veg erbee* fodmayd jannoo?' deie Bnr Thoot.

'Cha nel agh un chouyr da ny cribbaghyn,' as Mnr Thoot.

'Insh dou!' deie ee. 'Oh, insh dou dy tappee!'

'Ta feme ain er siyragey!' as Mnr Thoot.

'Ta mee aarloo. Nee'm siyragey! Nee'm red erbee t'ou cur orrym jannoo!' dyllee Bnr Thoot.

'Cha jean oo tannaghtyn bio rish foddey mannagh vel oo,' as Mnr Thoot, cur jee mongey elley veih mastey ny geayshteenyn echey.



'Cre ny te orryms jannoo?' deie Bnr Thoot, glackey ny lieckanyn eck.

'Shegin dhyt goll er *sheeyney*,' as Mnr Thoot.

Ta Bnr Thoot Goll er Sheeyney

Ren Mnr Thoot leeideil Bnr Thoot magh, as çheumooie v'eh er n'arlaghey dagh ooilley red son yn sheeyney mooar.

Va keead mollag echey as palçhey streng.

Va kylinder dy ghas ayn ry-hoi lhieeney ny mollagyn.

V'eh er chur fainey yiarn stiagh 'sy thalloo.

'Shass aynshoh,' dooyrt eh, cowraghey magh yn fainey yiarn. Eisht chiangle eh abaneyn Bnr Thoot rish yn 'ainey yiarn.

Tra va shen jeant, ghow eh toshiaght er lhieeney ny mollagyn lesh yn ghas. Va dagh mollag er streng liauyr as tra v'ee lhieent lesh gas hayrn ee er e streng, cur eab er irree as irree. Chiangle Mnr Thoot ny king jeh ny strengyn gys yn ayn s'yrjey jeh corp Bnr Thoot. Chiangle eh kuse jeu mygeayrt e mwannal, kuse jeu fo ny roihaghyn eck, kuse jeu da mwannalyn e laueyn as kuse jeu eer da'n 'olt eck.


Dy Leah va shiaghtad mollag daahit floadey 'syn aer erskyn kione Bnr Thoot.

'Vod oo gennaghtyn ad sheeyney oo?' vrie Mnr Thoot.

'Foddym! Foddym!' deie Bnr Thoot. 'T'ad sheeyney mee dy trome.'

Chiangle eh jeih mollagyn elley. Haink yn tayrn seose dy ve feer lajer.

Cha row niart ec Bnr Thoot nish. Lesh ny



cassyn eck kianglt rish yn thalloo as ny roihaghyn eck tayrnit seose ec ny mollagyn, cha dod ee gleashaghey. V'ee ny pryssoonagh, as ve fo Mnr Thoot goll ersooyl as faagail ee aynshen myr v'ee rish laa as oie ny ghaa dy chur fys jee. Dy firrinagh, v'eh er-çhee faagail tra doshil Bnr Thoot e beeal mooar as dooyrt ee red ennagh bolvaneagh.

'Vel oo shickyrt dy vel my chassyn kianglt dy kiart rish y thalloo?' ren ee scredey. 'My vees ny strengyn shen mygeayrt my abaneyn brishey, bee shen slane lhiam!'

As shen va cur da Mnr Thoot e nah eie neughennal.

Ta Bnr Thoot Mollagal Seose

'Ta tayrn dy liooar aynshoh dy ymmyrkey mee gys yn eayst!' deie magh Bnr Thoot.

'Dy ymmyrkey oo gys *yn eayst!*' deam Mnr Thoot. 'Cre'n smooïnaghtyn atçhimagh! Cha by vie lhien fakin lheid y taghyrt, oh cha by vie lhien, var-a-mish!'

'Cha by vie lhien dy jarroo!' deie Bnr Thoot. 'Kiangle tooilley streng rish my abaneyn dy tappee! By vie lhiam gennaghtyn sauçhey dy bollagh!'


'Kiart dy liooar, my ainle,' as Mnr Thoot, as lesh mongey gowlagh er ny meillyn echey hie eh sheese er e ghlioonyn roish ny cassyn eck. Hayrn eh skynn magh ass e phoggaid as lesh un vuilley tappee ghiar eh trooid ny strengyn va kiangley abaneyn Bnr Thoot rish yn 'ainey yiarn.

Hie ee seose gollrish roggad.

'Cooïn lhiam!' ren ee screeaghey. 'Saue mee!'

Agh cha row aght dy hauail ee nish. Ayns grig ny ghaa v'ee er ard heose 'sy speyr gorrym as girree dy bieu.

Va Mnr Thoot ny hassoo fo jeeaghyn seose. '*Lheid* yn reayrt aalin!' dooyrt eh rish hene. 'Cre cho aalin as ta ooilley ny mollagyn shen jeeaghyn 'sy speyr! As cre'n aigh vie yindyssagh orrym! Fy yerrey hoal ta'n çhenn chaillagh caillt as ersooyl son dy bragh.'



Ta Bnr Thoot Mollagal Neose

Foddee dy row Bnr Thoot graney as foddee dy row ee neughennal, agh cha row ee bolvaneagh.

Heose er ard aynshen 'sy speyr, va eie aghtal eck. 'Dy voddin geddyn rey rish kuse jeh ny mollagyn shoh,' dooyrt ee r'ee hene, 'yinnin cur kione er girree as goaill toshiaght er cheet neose.'



Ghow ee toshiaght er caigney trooid ny strengyn va kiangley ny mollagyn rish mwannalyn e laueyn as e roiaghyn as e mwannal as e folt. Dagh keayrt ghiar ee streng

lesh e feeackleyn as ren ee lhiggey da mollah
floadey ersooyl, va'n tayrn seose leodaghey as
haink yn leahys jeh'n irree eck dy ve ny s'melley.

Tra v'ee er chaigney trooid feed streng, scuirr
ee veih goll seose dy bollagh. Hannee ee gyn
gleashaghey 'syn aer.

Ren ee caigney trooid streng elley.

Dy moal as dy moal, ghow ee toshiaght er
floadey neose.

She laa kiune v'ayn. Cha row geay erbee ayn.
As er coontey jeh shoh, va Bnr Thoot er nirree
kiart seose dy jeeragh. Nish ghow ee toshiaght er
çheet kiart neose dy jeeragh.

Choud's v'ee floadey sheese dy mial, ren oanrey
Bnr Thoot booghey magh gollrish scaa
tuittymagh, soilshaghey magh e fo-hroosyn
liauyrey. She reayrt braew v'eh er laa lane
yindyssagh, as dettyl thousaneyn dy ushagyn
stiagh veih meeilaghyn mygeayrt dy vlakey er yn
çhenn ven neuchadjin 'syn aer.



Ta Greain Agglagh er Mnr Thoot

Va Mnr Thoot, as eh smooinghtyn dy row eh er
nakin e ven ghraney son y cheayrt s'jerree, ny
hoie 'sy gharey feailaghey lesh meddyr dy lhune.

Dy tostagh, haink Bnr Thoot floadey neose.
Tra v'ee mysh yrjid yn thie erskyn Mnr Thoot,
doaltattym dyllee ee magh ec mullagh e coraa,
'Shoh mish çheet nish, henn ghrangan
gheayshteenagh! Henn napin loauagh! Henn
hornaig hollagh!'

Ren Mnr Thoot clistal myr dy beagh gah jeh
shellan cabbyl foawragh er ve currit ayn. Huitt
eh yn lhune echey. Yeeagh eh seose. Vlake eh.
Ren eh scredey. Ren eh glugeraght. Haink feiyr
ny ghaa jeh toghtey magh ass e veéal.

*'Ughhhhhhhh!' as eshyn. 'Arghhhhhhhh!
Ouchhhhhhhh!'*




*'Verrym dhyts eh son shoh!' dyllee Bnr Thoot. V'ee floadey neose kiart erskyn echey. V'ee jiarg-gorrym lesh eulys as v'ee scuitchal 'syn aer lesh e maidjey shooyl liauyr ersyn haink ee lesh ayns aght ennagh cummal greim yn clane traa. 'Nee'm swishal oo gys swoshagh!' dyllee ee. 'Nee'm swoshal gys swishagh! Nee'm snasheral oo gys snoshagh! Nee'm snosheral oo gys snashagh!' As roish my row traa dy liooar da Mnr Thoot roie er-
chea, haink neose yn bart shoh dy vollagyn as dy*

oashyryn as dy eulys elgyssagh kiart er mooin echey, as y maidjey scuitchey magh huggey as veih as bwoalley eh ooilley mygeayrt y chorp echey.

Yn Thie as Yn Billey as Caaidje ny Apagyn

Agh shen dy liooar jeh shen. Cha nodmayd goll er son dy bragh jeeaghyn er yn daa 'er feohdagh shoh as yn jannoo feohdagh er y cheilley. Shegin dooin goll roin lesh yn skeeal.

Shoh diu caslys jeh thie as garey Mnr as Bnr Thoot. Lheid yn thie eh! T'eh jeeaghyn gollrish pryssoon. As gyn uinnag ayn boayl erbee.



'Quoi ta gearree uinnagyn?' va Mnr Thoot er ngra tra v'ad troggal eh. 'Quoi ta gearree dagh Tom as Dick as Harry keekal stiagh ayn dy yeeaghyn er ny ta shin jannoo?' Cha daink eh stiagh ayns kione Mnr Thoot dy row yn oyr jeh uinnagyn, shen dy yeeaghyn magh ass, cha nee son jeeaghyn stiagh ayn.



As cre t'ou smooïnaghtyn mychione yn gharey agglagh shen? She Bnr Thoot va ny gareyder. V'ee feer vie cuirr onnaneyn as undaagaghyn. 'Ta mee dy kinjagh cuirr palçhey dy onnaneyn birragh as palçhey dy undaagaghyn guinnagh,' yiarragh ee. 'T'ad freayll magh paitçhyn beggey skeetagh graynoil.'

Faggys da'n thie foddee oo fakin bwaane obbree Mnr Thoot.

Ry-lhiattee ta Yn Billey Marroo Mooar. Cha nel duillagyn er rieau er yn oyr dy vel eh marroo.

As cha nee foddey veih'n villey eh, foddee oo fakin caaidje ny apagyn. Ta kiare apagyn ayn. S'lesh Mnr Thoot ad. Nee oo clashtyn my-nyn-gione ny s'anmey.



Glooië Lhiantagh Clameçhionn


Un cheayrt 'sy çhiaghtin, Jecrean, va Pye Ushag ec ny Thootyn son shibber. She Mnr Thoot va tayrtyr ny ushagyn as ren Bnr Thoot ad y choagyrey.

Va Mnr Thoot mie ec tayrtyr ushagyn. Yn laa roish laa Pye Ushag, verragh eh yn aarey seose noi Yn Billey Marroo Mooar as yinnagh eh drappal stiagh mastey ny banglaneyn lesh cruick dy ghlooië as skeaban peint. Yn glooië v'eh gymmydey, she red ennagh enmyssit CLAMEÇHIONN v'eh as v'eh ny s'lhiantee na glooië erbee elley 'sy theihll. Yinnagh eh slaa eh harrish eaghtyr heose ny banglaneyn ooilley as eisht ragh eh ersooyl.

Choud's va'n ghrian goll dy lhie, yinnagh ushagyn etlagh stiagh veih ooilley mygeayrt dy gholl er farrar rish yn oie ayns Yn Billey Marroo

Mooar. Cha row fys oc, nyn moghtyn millish, dy row ny banglaneyn ooilley smearit lesh CLAMEÇHIONN agglagh. Cho Leah as haink ad neose er banglane, va ny cassyn oc festit as va shen eh.

Yn moghrey er-giyn, va ny laa Pye Ushag, yinnagh Mnr Thoot drappal seose yn aarey reesht as goaill greim er ooilley ny ushagyn treih va festit rish yn villey. By gummey lhieu yn dooie v'ayn – treshlen, lhondoo, sparroo, fannag, drean beg, spittag yiarg, red erbee – hie ad ooilley stiagh 'sy phott son shibber Pye Ushag Crean.




Kiare Guillyn Beggey Lhiantagh

Fastyr beg Jemayrt dy row lurg da Mnr Thoot goll seose yn aarey as va'n billey slaait lesh CLAMEÇHIONN, ren kiare guillyn beggey snaue stiagh ayns y gharey dy yeeaghyn er ny apagyn. By gummey lhieu ny onnaneyn as ny undaagaghyn, cha nee tra va apagyn dy yeeaghyn er. Lurg tammylt, haink ad dy ve skee jeh jeeaghyn er ny apagyn, myr shen ren ad ronsaghey ny s'odjey stiagh 'sy gharey as hooar ad yn aarey ny lhie noi Yn Billey Marroo Mooar. Ren ad reaghey dy ghrappal seose eh jus myr spoyrt.

Cha nel veg aggairagh lesh shen.

Yn moghrey er-giyn, tra hie Mnr Thoot magh dy hymzaghey ny ushagyn, hooar eh kiare guillyn beggey treih nyn soie ayns y villey, as adsyn festit cho çhionn as oddagh ad ve liorish thoynd ny troosyn oc rish ny banglaneyn. Cha row ushag erbee ayn er yn oyr dy row fenish ny guillyn er nagglaghey ersooyl ad.

Va Mnr Thoot fergagh. 'Er yn oyr nagh vel ushagyn ayn son yn phye aym noght,' dyllee eh, 'eisht shegin da ve *guillyn* ayns ynyd jeh shen!' Ghow eh toshiaght er drappal seose yn aarey. 'Foddee dy bee Pye Guilley ny share na Pye Ushag,' dooyrt eh, lesh mongey atçhimagh. 'Towse smoo dy eill as gyn whilleen dy chraueyn feer pheeogeagh!'



Va ny guillyn agglit ass. 'T'eh fo broie shin!' dyllee fer jeu.


'Nee eh broish jin, as shinyn bio!' ren yn nah er keayney.

'Nee eh coagyrey shin lesh ny carraidyn!' ren yn trass er coe.

Agh ren yn chiaroo guilley sansheraght, echey va tushtey ny smoo na v'ec ny fir elley, 'Eaisht-gee, ta eie er jeet hym. Cha nel shin festit agh liorish *thoyn ny troosyn ain*. Myr shin, dy bieu nish! Feayshil-gee crammanyn nyn droosyn as snaue-gee magh assdaue as tuitt-gee shiu hene sheese gys y laare!'

Va Mnr Thoot er roshtyn mullagh yn aarey as v'eh er-çhee goaill greim er yn ghuilley s'niessey tra ren ad oilley dy doaltattymagh tuittym magh ass y villey as roie ad thie as ny thoynyn rooisht oc meekey er y ghrian.





Yn Kiarkys Mooar Apag Bun-Ry-Skyn

Nish son ny apagyn.

Va ny kiare apagyn 'sy chaaidje ayns y gharey ooilley jeh'n un lught-thie. She Muggyl-Wump as e ven as yn daa phaitçhey beg oc v'ayn.

Agh cre 'sy theihll va jannoo er Mnr as Bnr Thoot dy row apagyn 'sy gharey oc?

Wahll, ayns ny shenn laghyn, v'ad ny neesht er nobbraghey da kiarkys myr ynseyderyn apag. Yinnagh ad ynsaghey da apagyn jannoo clistyn aitt as cur moo eaddagh dooinnoil as toghtaney piobyn as ooilley yn stoo elley jeh lhied y voghtynid shen.

Jiu, ga dy row ad nyn daaue, va Mnr Thoot foast gearree ynsaghey apagyn. She'n ashlish echey dy by leshyn laa ennagh yn chied KIARKYS MOOAR APAG BUN-RY-SKYN 'sy theihll.

Shen dy ghra dy row eh er ny apagyn jannoo dagh ooilley red bun-ry-skyn. Ve orroo daunsin

bun-ry-skyn (er ny laueyn oc as nyn gassyn 'syn aer). Ve orroo cloie bluckan coshey bun-ry-skyn. Ve orroo cormaghey ad hene fer er mooin fer elley bun-ry-skyn, lesh Muggyl-Wump ec y vun as yn babban apag sloo ec yn eer vaare. Ve orroo eer ee as iu bun-ry-skyn as cha nee aashagh yn jannoo shen er yn oyr dy vel eh er yn vee as yn ushtey goll *seose* dty ahjioogh ayns ynyyd jeh *sheese*. Dy firrinagh, bunnys cha nod eh ve jeant, agh cha row niart ec ny apagyn er agh dy yannoo eh er nonney cha voghe ad veg.

S'ommidjagh dy liooar ta shoh ooilley dhyts as dooys. S'ommidjagh dy liooar v'eh da ny apagyn neesht. Va dwoaie oc er ve eignit dy yannoo yn boghtynid bun-ry-skyn shoh laa lurg laa. Hug eh thollaneys orroo as adsyn nyn shassoo er nyn ging rish oor lurg oor. Ny keayrtyn yinnagh yn daa phaitçhey apag beggey tuittym my neealoo lesh wheesh fuill goll gys nyn ging. Agh by gummeys shen lesh Mnr Thoot. Hug eh orroo jannoo cliaghtey rish shey ooryn dagh laa as mannagh ren ad cooilleeney ny saraghyn va currit daue, yinnagh Bnr Thoot roie gyshen dy Leah lesh yn vaidjey atçhimagh eck.




Ta'n Kellagh Rollee-Pollee ny Livreyder

By vian lesh Muggyl-Wump as e lught-thie dy scapail ass yn chaaidje ayns garey Mnr Thoot dy gholll er-ash gys doofyr yn Affrick, yn boayl haink ad voish.

Va dwaiaie oc er Mnr as Bnr Thoot son jannoo cho treih yn vea oc.

V'ad cur dwaiaie orroo er-coontey jeh ny v'ad jannoo rish ny ushagyn dagh Mayrt as Crean. 'Ettyl-jee ersooyl, ushagyn!' yinnagh ad yllagh magh, lheimmey mygeayrt 'sy chaaidje as craa ny roihagyn oc. 'Ny soie-jee sheese er Yn Villey Marroo Mooar shen! T'eh kiart er ve smearit ooilley harrish lesh glooie lhiantagh! Immee-jee as soie-jee ayns boayl ennagh elley!'

Agh v'ad shoh nyn ushagyn Sostnagh as cha dod ad toiggal yn ghlare waagh Affrickagh va ny apagyn loayrt. Myr shen cha derragh ad geill



erbee as ragh ad er lesh ymmydey Yn Billey
Marroo Mooar as harragh ad dy ve tayrit son Pye
Ushag Bnr Thoot.

Eisht laa dy row, dettyl ushag braew stoamey
dy jarroo neose ass yn speyr as haink eh gys y
thalloo er caaidje ny apagyn.

‘Shee bannee mee!’ dyllee ooilley ny apagyn ry
cheilley. ‘She’n Kellagh Rollee-Pollee t’ayn! Cre
’sy theihll t’ou jannoo aynshoh ayns Sostyn,
Chellagh Rollee-Pollee?’ Gollrish ny apagyn, va’n
Kellagh Rollee-Pollee ass yn Affrick as v’eh loayrt
yn un ghlare as adsyn.

‘Ta mee er jeet dy cheau laghyn seyrey,’ as yn
Kellagh Rollee-Pollee. ‘S’mie lhiam troailt.’ Hrog
eh yn chlooie echey as yeeagh eh neose beggan dy
oasle er ny apagyn. ‘Son yn chooid smoo dy leih,’
hie eh er, ‘s’feer chostalagh eh dy etlagh ersooyl
dy cheau laghyn seyrey, agh foddym etlagh boayl
erbee ’sy theihll son veg.’

‘Vel fys ayd er yn aght dy loayrt rish ny
ushagyn Sostnagh shoh?’ vrie Muggyl-Wump jeh.

‘Dy jarroo ta,’ as yn Kellagh Rollee-Pollee. ‘Cha
neeu eh goll gys çheer gyn fys er y ghlare.’

‘Eisht shegin dooin jannoo siyr,’ as Muggyl-
Wump. ‘Jemayrt t’ayn jiu as aynshid foddee oo
fakin hannah yn Mnr Thoot feohdagh heose er yn
aarey, as eh slaa glooie lhiantagh er ooilley ny
banglaneyn jeh Yn Villey Marroo Mooar. Fastyr
beg shoh tra vees ny ushagyn çheet stiagh dy
gholl dy lhie, shegin dhyt cur raau daue gyn soie


sheese er y villey shen er nonney bee Pye Ushag
jeant jeu.’

Yn fastyr beg shen, dettyl yn Kellagh Rollee-
Pollee mygeayrt as mygeayrt Yn Billey Marroo
Mooar goaill yn arrane,

‘Ta stoo lhiantagh slaait ’sy villey mooar marroo!
My vees shiuish bentyn rish, shen eh dy jarroo!
Magh ass shoh, ooilley! Nish dettyl-jee veih!
Er nonney bee shiuish eisht currit ayns pye!’

Gyn Pye Ushag son Mnr Thoot

Y moghrey er-giyn tra haink Mnr Thoot magh lesh y vastag vooar echey dy ghoail greim er ooilley ny ushagyn veih Yn Villey Marroo Mooar, cha row eer un ushag er. V'ad ooilley nyn soie er mullagh caaidje ny apagyn. Va'n Kellagh Rollee-Pollee aynshen neesht, as va Muggyl-Wump as e lught-thie cheusthie jeh'n chaaidje as v'ad ooilley garaghtee er Mnr Thoot.



Foast Gyn Pye Ushag son Mnr Thoot


Cha row Mnr Thoot coontey monney jeh fuirraghtyn rish shiaghtin elley son yn çhibber Phye Ushag echey. Bynney lesh Pye Ushag. She'n reih-lhongey echey eh. Myr shen yn un laa cheddin, hie eh dy hayrtyn ny ushagyn reesht. Y keayrt shoh ren eh slaa ooilley ny maidjaghyn er mullagh caaidje ny apagyn lesh glooie lhiantagh, chammah's banglaneyn Yn Villey Marroo Mooar. 'Nish nee'm tayrtyr shiu,' as eshyn, 'cre erbee jeu ta shiu soie sheese er!'

Va ny apagyn croymmey sheese cheusthie jeh'n chaaidje lesh shilley er ooilley va goll er, as ny s'anmey, tra hug yn Kellagh Rollee-Pollee roar neose dy heet son cowag 'syn astyr beg, dyllee ad,

'Ny benn rish y chaaidje ain, Chellagh Rollee-Pollee! T'eh coodit lesh glooie lhiantagh! Yn billey myrgeddin!

As y fastyr beg shen, choud's va'n ghrian goll dy lhie as haink ooilley ny ushagyn stiagh dy gholll er farrar fud ny h-oie, dettyl yn Kellagh Rollee-Pollee mygeayrt as mygeayrt caaidje ny apagyn as Yn Villey Marroo Mooar, goaill arrane dy chur raaue,

'Ta stoo lhiantagh er y chaaidje *as*'sy villey mooar marroo! My vees shiuish bentyn roo, shen eh dy jarroo! Magh ass shoh, ooilley! Nish dettyl-jee voue! Er nonney bee shiuish ayns pye – shen my raaue!




Ta Mnr as Bnr Thoot Goll Roue dy Chionnaghey Gunnyn

Yn moghrey er-giyn tra haink Mnr Thoot magh lesh e vastag 'oawragh, cha row eer un ushag ny soie eddyr er caaidje ny apagyn ny er Yn Villey Marroo Mooar. V'ad ooilley nyn soie dy maynrey er mullagh thie Mnr Thoot. Va'n Kellagh Rollee-Pollee heose aynshen neesht, as va ny apagyn 'sy chaaidje as va'n clane çhionnal garaghtee er ard er Mnr Thoot.

'Nee'm scughey yn gearey bolvaneagh shen veih nyn ngib!' ren Mnr Thoot screeaghey er ny ushagyn. 'Nee'm tayrtyn shiu y nah cheayrt, 'laiee edjagagh hollagh myr ta shiuish! Nee'm cassey nyn mwannalyn, yn clane chlein jiu, as verry m erriu goll er cloie 'sy phot son Pye Ushag roish jerrey yn laa shoh!

'Cre'n aght te foyd jannoo shen?' vrie Bnr Thoot, v'er jeet magh dy gheddyn magh oyr ny feiyrn ooilley. 'Cha nel mee cur kied dhyt slaa glooie lhiantagh ooilley harrish mullagh y thie



ain!

Haink Mnr Thoot dy ve feer ghreesit. 'Ta eie feer vie aym!' dyllee eh. Cha ren eh boirey eh hene dy 'reayll kiune y choraa echey er yn oyr dy row eh smooïnaghtyn nagh dod ny apagyn toiggal eh. 'Hemmayd ny neesht stiagh 'sy valley as kionneemayd gunn y pheesh!' deam eh. 'Cre mychione shen?'

'Yindyssagh!' dyllee Bnr Thoot, mongey as cur ayns lane reayrt ny feeackleyn liauyrey bwee eck. 'Kionneemayd ny gunnyn spreih mooarey shen ta spreih magh queigad bullad ny ny shlee lesh dagh polt!'

'Dy jarroo,' as Mnr Thoot. 'Cur glass er yn thie choud's ta mish goll dy yannoo shickyr dy vel ny apagyn jeight stiagh dy sauçhey.'



Hie Mnr Thoot hoal gys caaidje ny apagyn. 'Shun!' ren eh gounstyrnee 'sy choraa agglagh echey myr ynseyder apag. 'Bun-ry-skyn lhiu ooilley as jean-jee siyr! Fer er mooin fer elley! Dy bieau! Immee-jee reue er nonney nee shiu ennaghtyn maidjey Bnr Thoot harrish nyn dhoyryn!'

Dy biallagh, hass ny apagyn boghtey er nyn laueyn as ren ad drappal seose, fer er mooin fer elley, as Muggyl-Wump ec y vun as yn paitçhey sloo ec yn eer vaare.

'Nish, tantee-jee aynshen derrey higmayd back!' hug Mnr Thoot sarey. 'Ta mee cur raaue diu, ny gleash-jee! As ny caill-jee yn cormid eu!

Tra higmayd back mysh oor ny ghaa voish nish,
bee'm jerkal dy bee shiu oilley dy jeeragh 'syn un
chumme y as ta shiu nish! Vel shiu dy my
hoiggal?'

Er shen, ren Mnr Thoot keimyragh ersooyl.
Hie Bnr Thoot marish. As va ny apagyn faagit
nyn lomarcan marish ny ushagyn.




Ta Eie ec Muggyl-Wump

Cho Leah as va Mnr as Bnr Thoot ass shilley sheese y raad, ren ny apagyn çhyndaa dy hassoo jeeragh er ny cassyn oc. 'Dy tappee, cur lhiat yn ogher!' deam Muggyl-Wump er yn Chellagh Rollee-Pollee va foast ny hoie er mullagh yn thie.

'Cre'n ogher shen?' dyllee yn Kellagh Rollee-Pollee.

'Yn ogher da dorrys y chaaidje ain,' deam Muggyl-Wump. 'T'ee croghey er treiney 'sy waane



obbree. Shen yn boayl t'eh rieu cur ee.'

Dettyl yn Kellagh Rollee-Pollee neose as haink eh back lesh yn ogher 'sy ghob echey. Heeyn Muggyl-Wump laue magh eddyr maidjaghyn yn chaaidje as ghow eh yn ogher. Hug eh 'sy ghllass ee as hyndaa eh ee. Doshil yn dorrys. Ren ny kiare apagyn ooilley lheimmey magh ry cheilley.

'Ta shin seyr!' dyllee yn daa 'er beggey. 'C'raad hemmayd, Yishag? C'raad neemayd keiltyn?'

'Ny tar-jee dy ve greesit,' as Muggyl-Wump. 'Bee-jee feagh nish, shiuish ooilley. Roish dooin scapail veih'n voayl neughennal shoh ta un red feer scanshoil ry-yannoo ain.'

'Cre shen?' vrie ad jeh.

'Neemayd cur ny Thootyn agglagh shen BUN-RY-SKYN!'

'Cre neemayd?' deam ad. 'Spotçh shen t'ayd, Yishag, nee?'

'Cha nee spotçh t'aym,' as Muggyl-Wump. 'Neemayd cur Mnr as Bnr Thoot ny neesht BUN-RY-SKYN as ny lurgaghyn oc 'syn aer!'

'Ny bee bolvaneagh,' as yn Kellagh Rollee-Pollee. 'Cre'n aght 'sy theihll fodmayd cur yn daa vuggane crooagagh shen bun-ry-skyn?'

'Fodmayd, fodmayd!' deam Muggyl-Wump. 'Neemayd cur orroo ve nyn shassoo er nyn ging rish ooryn as ooryn! Foddee son dy brag! Lhig *dauesyn* feddyn magh yn aght ta shen gennaghtyn, dy yannoo caghlaa.'


‘Cre’n aght?’ as yn Kellagh Rollee-Pollee. ‘Jus insh dou yn aght.’

Chleayn Muggyl-Wump e chione gys un çheu as ren mongey meekagh beg bentyn rish corneilyn e veeal. ‘Eisht as nish,’ as eshyn, ‘agh cha nee feer vennick, ta eie yindyssagh aym. Shoh fer jeu. Eiy-r-jee orrym, my chaarjyn, eiy-r-jee orrym.’ Ren eh roie roish hug yn thie as hie ny tree apagyn elley as yn Kellagh Rollee-Pollee marish.

‘Cruickyn as skeabany’n peint!’ deam Muggyl-Wump. ‘Shen myr ta feme ain er ’sy nah ynnyd! Ta palçhey jeu ’sy waane obbree! Jean-jeé siyr, shiuish ooilley! Gow-jeé cruick as skeaban peint!’

Çheusthie jeh bwaane obbree Mnr Thoot va stoandey buillvollee dy ghlooié lhiantagh CLAMEÇHIONN, yn stoo v’eh gymmydey dy hayrtyn ushagyn. ‘Lhieen-jeé seose ny cruickyn eu!’ hug Muggyl-Wump sarey. ‘Nish ta shin er-çhee goll stiagh ’sy thie hene!’

Va Bnr Thoot er cheiltyn yn ogher da dorrys toshee yn thie fo’n vreshag as va Muggyl-Wump er n’akin ee choud’s v’ee jannoo eh, myr shen by aashagh eh daue cosney stiagh ayn. Stiagh lhieu, ooilley ny kiare apagyn, as ny cruickyn dy ghlooié lhiantagh oc. Eisht haink yn Kellagh Rollee-Pollee as eh getlagh stiagh nyn lurg, as cruick ’sy ghob echey as skeaban ayns e chroag.



Toshiaght jeh Slaa Mooar yn Ghlooié

‘Shoh yn çhamyr hoie,’ ren Muggyl-Wump fogrey magh. ‘Shamyr hoie vooar ghloyroil ee raad ta’n daa sleetçh skelimagh agglagh shen gee Pye Ushag dagh shiaghtin son shibber!’

‘Ny tar er Pye Ushag reesht, my sailt,’ as yn Kellagh Rollee-Pollee. ‘Te cur mee er creau.’

‘Shegin dooin gyn jummal traá!’ deam Muggyl-Wump. ‘Jean-jeé siyr! Jean-jeé siyr! Shoh yn chieid churrym! Shegin diu ooilley slaá glooié lhiantagh ooilley harrish y far voalley! Slaa-jeé ooilley jeh! Smear-jeé eh stiagh ayns dagh uillin!’

‘Harrish y far voalley!’ deam ad. ‘Cre’n fa yn far voalley?’

‘S’cummey lhiu yn oyr!’ dyllee Muggyl-Wump. ‘Jus cooilleen-jeé yn sarey ta currit diu as ny jean-jeé arganeys!’

‘Agh cre’n aght fodmayd goll seose gys shen?’



vrie ad. 'Cha nodmayd roshtyn eh.'


'Foddee apagyn roshtyn boayl erbee!' dyllee Muggyl-Wump.

Va keoieid dy ghreesaghey jannoo ersyn nish, as eshyn craa y skeaban peint as yn chruick ehey as lheimmey huggey as veih ooilley mygeayrt y chamyr.

'Tar-jee reue, tar-jee reue! Lheim-jee seose er y voayrd! Shass-jee er ny caayryn! Jean-jee drappal seose er ny gayltn ec y cheilley! Foddee Rollee-Pollee jannoo eh as eh getlagh!

'Ny shass-jee aynshen blakey! Shegin dooin jannoo siyr, nagh vel shiu toiggal shen? Hig ny Thootyn atchimagh shen back traa erbee as yn

keayrt shoh bee *gunnyn* oc! Immee-jee reue, son graih nyn mioys! Immee-jee reue!



As myr shen haink toshiaght jeh slaa moar yn ghlooie er yn 'ar voalley.

Ooilley ny ushagyn elley va er ve nyn soie er mullagh y thie, dettyl ad stiagh dy chooney, ymmyrkey skeabanynt peint ayns ny croagyn as ny gib oc.

Va shirree as pieanatyn as troghanyn dooey as fee as ymmodde dooieyn elley t'ayn.



Va dagh oilley 'er jeu skeolley
mygeayrt dy keoie as lesh whilleen
dy chooneyderyn, va kione currit er
yn job dy leah.



Ta'n Brat Laare Goll er yn 'Ar Voalley

'Cre nish?' as adsyn ooilley, jeeaghyn er Muggyl-Wump.

'Ah-ha!' deam Muggyl-Wump. 'Nish son yn spoyrt! Nish son yn chlist smoo bun-ry-skyn er dy rieu! Vel shiu aarloo?'

'Ta shin aarloo,' as ny apagyn. 'Ta shin aarloo,' as ny ushagyn.

'Tayrn-jee magh yn brat laare!' dyllee Muggyl-Wump. 'Tayrn-jee magh yn brat laare feer voar shoh veih fo'n chooid thie as jean-jee festal eh rish yn ar voalley!'

'Rish yn *ar voalley!*' deie fer jeh ny apagyn beggey. 'Agh cha nod shen ve jeant, Yishag!'

'Nee'm festal uss rish yn ar voalley mannagh vel oo cummal dty hengey!' as Muggyl-Wump dy



gyere.

'T'eh ass e cheeayl!' deam ad.

'T'eh branlaadee!'

'T'eh er choayl ny h-inçhyn echey!'

'T'eh er shaghryn!'

'T'eh cabbarey!'

'T'eh ersooyl keim!' as yn Kellagh Rollee-Pollee.

'Ta Muggyl boght er duittym veih'n wump echey fy yerrey hoal!'


'Oh, scuirr-jee veih gyllagh magh lheid y voghtynid as cooin-jee lhiam,' as Muggyl-Wump, choud's v'eh goaill greim er un chorneil jeh'n vrat laare. 'Tayrn-jee, my 'liddyn, tayrn-jee!'

S'buillvollee va'n brat laare. V'eh coodaghey yn clane laare veih boalley gy voalley. Va cummey er jiarg as airhoil. Cha nee aashagh eh, tayrn brat



laare buillvollee veih'n laare tra ta'n çhamyr lane dy vuird as dy chaayryn. 'Tayrn-jee!' ren Muggyl-Wump screeaghey. 'Tayrn-jee, tayrn-jee, tayrn-jee!' V'eh gollrish jouyl, lheimmey mygeayrt y çhamyr as ginsh da dagh ooilley pheiyagh ny ve orroo jannoo. Agh cha dod uss cur yn foill ersyn. Lurg meeghyn as meeghyn jeh ve ny hassoo er e ching marish e lught-thie, v'eh goaill foddeeaght son yn traa veagh ny Thootyn agglagh jannoo yn un red. Ec y chooid sloo shen myr va'n treisht echey.

Lesh ny apagyn as ny ushagyn ooilley tayrn as pandooch, va'n brat laare tayrnit veih'n laare as fy yerrey v'eh troggit seose gys yn 'ar voalley. As aynshen v'eh festit. Doaltattym, va'n clane ar voalley jeh'n çhamyr soie coodit lesh brat jiarg as airhoil.



Ta'n Choid Thie Goll Seose



'Nish yn boayrd, yn boayrd mooar!' dyllee Muggyl-Wump. 'Cur-jee yn boayrd bun-ry-skyn as cur glout dy ghlooie lhiantagh er y vun jeh dagh cass. Eisht neemayd festal shen rish yn 'ar voalley neesht!'

Cha nee job aashagh va troggal yn boayrd feer vooar bun-ry-skyn seose gys yn ar voalley, agh haink eh lhieu fy yerrey.

'Jean eh cummal aynshen?' deie ad. 'Vel yn glooie lajer dy liooar dy chummal seose eh?'

'She'n glooie s'troshey 'sy theihll eh!' dreggyr Muggyl-Wump. 'Shoh'n glooie er-lleh ta tayrtyn as marroo ushagyn tra t'eh slaait er biljyn!'

'My sailt,' as yn Kellagh Rollee-Pollee. 'Vrie mee jeed hannah gyn cheet er yn chooish shen. Cre veagh oo smooinghtyn dy re Pye Apag va



goll er jannoo oc dagh Jecrean as va ooilley dty chaarjyn er ve broiet as hie mish er loayrt my-e-chione?'


'Gow my leshtal, dy feer,' as Muggyl-Wump. 'Ta mee cho greesit, s'goan ta fys aym er ny ta mee gra!'

'Nish ny caayryn! Jean-jee yn un red lesh ny caayryn! Shegin da ooilley ny caayryn ve festit bun-ry-skyn rish yn ar voalley! As ayns ny buill kiart! Oh, jean-jee siyr, shiuish ooilley! Traa erbee nish, nee yn daa leetch sollagh shen roie stiagh orrin lesh ny gunnyn oc!'



Ren ny apagyn, as ny ushagyn cooney lhieu,
cur glooie er y vun jeh dagh cass chaayr as hrog
ad seose ad gys yn 'ar voalley.

'Nish ny buird sloo!' dyllee Muggyl-Wump. 'As
yn aashag vooar! As yn lieh-voayrd! As ny
cressadyn! As ooilley ny nheeghyn feer



pheeogeagh! Ny shliggyn leoie! Ny ornaidyn! As
yn trollag phlastagh ghraney er y lieh-voayrd!
Shegin da dagh ooilley nhee, dagh ooilley ooilley
nhee, ve festit rish yn 'ar voalley!


S'doillee agglagh va'n obbyr. S'doillee er-lheh
va festal dagh ooilley nhee rish yn 'ar voalley 'sy
voayl kiart dy jeeragh. Agh ve jeant oc fy yerrey
hoal.

'Cre nish?' vrie yn Kellagh Rollee-Pollee. V'eh
ass ennal as cho skee, s'goan oddagh eh bennalt
ny skianyn ehey.

'Nish ny caslyssyn!' deam Muggyl-Wump. 'Cur-
jee ooilley ny caslyssyn bun-ry-skyn! As by vie
lhiam fer jeh ny ushagyn getlagh magh gys y raad

as freayll arrey dy 'akin tra vees ny sleetçhyn
sollagh shen çheet back.'

'Hem's,' as yn Kellagh Rollee-Pollee. 'Nee'm
soie sheese er ny strengyn çhellvane as freayll
arrey. Ver shen aash orrym.'



Ta ny Fee Cur Rooar Harrish

Va kione jus er ve jeant ec yn job lioroo tra hug yn
Kellagh Rollee-Pollee rooar neose as stiagh ayn,
as eshyn screeaghey, 'T'ad çheet back! T'ad çheet
back!'

Dy tappee, dettyl ny ushagyn back gys
mullagh yn thie. Ren ny apagyn siyragey stiagh
'sy chaaidje oc as hass ad bun-ry-skyn fer er
mooin fer elley. Grig ny s'anmey, haink Mnr as
Bnr Thoot keimyragh stiagh 'sy gharey, as va
dagh fer jeu gymmyrkey gunn va cooie dy chur
aggle er red erbee.

'S'mie lhiam fakin dy vel ny apagyn shen foast
bun-ry-skyn,' as Mnr Thoot.

'T'ad ro vee-cheeyllagh dy yannoo veg elley,' as
Bnr Thoot. 'Hoi, jeeagh er ooilley ny ushagyn
daaney shen, foast heose aynshen er mullagh yn



thie! Lhig dooin goll stiagh ayn as cur grine ayns ny gunnyn aalin noa ain as eisht bee *polt polt polt* as Pye Ushag son shibber.'

Kiart choud's va Mnr as Bnr Thoot er-çhee goll stiagh 'sy thie, hug daa 'eeagh doo roar neose dy injil erskyn ny king oc.

Va dagh feeagh gymmyrkey skeaban peint ayns e chroag as va dagh skeaban peint slaait lesh glooie lhiantagh.

Choud's va ny fee skiootal harrish, ren ad skeabey schimmeig dy ghlooie lhiantagh er claiginyn king Mnr as Bnr Thoot. S'eddrym yn aght v'ad bentyn roo, agh ny yei shen dennee ny Thootyn ny neesht eh.

'Cre va *shen*?' deam Bnr Thoot. 'Ta beisht ennagh dy ushag er duittym e keck sollagh er my chione!'


'Er y chione ayns neesht!' dyllee Mnr Thoot. 'Dennee mee eh! Dennee mee eh!'

'Ny loaght rish!' deam Bnr Thoot. 'Yiow uss eh ooilley harrish dty laueyn! Tar stiagh as neemayd niee jin eh ayns yn veilley oonlee!'

'Veishtyn vreinn hollagh!' deam Mnr Thoot. 'Ta mee shickyr dy ren shiu shen dy jioinagh! Verrym diuish eh tra ta grine 'sy ghunn aym!'

Hooar Bnr Thoot yn ogher veih fo'n vreshag dorrays (boayl va Muggyl-Wump er chur yn ogher back dy kiarailagh) as stiagh lhieu 'sy thie.






Ta ny Thootyn Currit Bun-ry-Skyn

'*Cre ta shoh?*' ren Mnr Thoot scredey choud's v'ad shooyl stiagh 'sy çhamyr hoie.

'*Cre haghyr?*' ren Bnr Thoot screeaghey.

V'ad nyn shassoo ayns mean y hamyr, as yeeagh ad seose. Va ooilley yn chooid thie, yn boayrd mooar, ny caayryn, yn aashag, ny buird veggey, yn cabnaid as ny boteilyn dy lhune ayn, ny ornaidyn, yn aile lectragh, yn brat laare, dagh



nhee, festit rish yn ar voalley. Va ny caslyssyn bun-ry-skyn er ny boallaghyn. As yn laare v'ad nyn shassoo er, v'eh lhome dy bollagh. Ny smoo na shen, v'eh peintit bane dy yeeaghyn gollrish yn 'ar voalley.

'*Jeeagh!*' ren Bnr Thoot screeaghey. '*Shen yn laare! Ta'n laare heose aynshen! Shoh yn far voalley! Ta shin nyn shassoo er yn 'ar voalley!*'

'*Ta shin BUN-RY-SKYN!*' ren Mnr Thoot scredey. 'Shegin da shen ve yn ansoor. Ta shin

nyn shassoo er yn 'ar voalley jeeaghyn sheese er y laare!

'Oh cooin lhiam!' ren Bnr Thoot screeaghey. 'Couyr, couyr, couyr! Ta mee goaill toshiaght er gennaghtyn thollaneagh!'

'Mish myrgeddin! Mish myrgeddin!' deam Mnr Thoot. 'Cha mie lhiam shoh er chor erbee!'

'Ta shin bun-ry-skyn as ta ooilley yn 'uill goll gys my chione!' ren Bnr Thoot screeaghey. 'Mannagh vel shin jannoo red ennagh dy bieau, yiwymys baase, ta fys aym dy noyms!'

'Te aym!' dyllee Mnr Thoot. 'Ta fys aym er ny ta ry-yannoo ain! *Neemayd shassoo er nyn ging, eisht ec y chooid sloo beemayd 'syn ymmyrkey kiart.'*

Myr shen hass ad er nyn ging, as dy



dooghyssagh, cho Leah's venn claignyn nyn ging rish yn laare, ren yn glooie lhiantagh va slaait orroo liorish ny fee shallid ny ghaa roish shen yn job echey. V'ad festit. V'ad goit, tayrit, pryssoonit, kianglt rish ny claryn laarey.

Trooid scolt 'sy ghorrys va ny apagyn jeeaghyn orroo. V'ad er lheimmey kiart magh ass y chaaidje cho Leah's va ny Thootyn er ngoll stiagh ayn. As va'n Kellagh Rollee-Pollee jeeaghyn orroo. As dettyl ooilley ny ushagyn elley stiagh as magh lesh shilley er yn reayrt erskyn dooghys shoh.



Ta ny Apagyn Scapail

Yn fastyr beg shen, hie Muggyl-Wump as e lught-thie seose gys yn cheyll vooar ec mullagh yn chrink, as ayns yn villey s'yrjey jeusyn ooilley hrog ad thie biljagh yindyssagh. Hrog ooilley ny ushagyn, as ny fir vooarey er-lheh, ny fannagyn as ny troghanyn dooey as ny pieanatyn, nyn idd mygeayrt y thie biljagh nagh vod peiagh erbee rieu fakin eh veih'n thaloo.

'Cha nod shiu tannaghtyn aynshoh son dy bragh, t'ou toiggal,' as yn Kellagh Rollee-Pollee.

'Cre'n fa nagh?' vrie Muggyl-Wump. 'She boayl aalin eh.'

'Agh cre mychione 'sy gheurey?' as yn Kellagh Rollee-Pollee. 'Cha mie lesh apagyn earish 'eayr, nagh vel shen myr te?'

'Cha mie lhieu dy jarroo!' deie Muggyl-Wump. 'Vel ny geuraghyn cho feayr as shen aynshoh?'

'T'ad lane dy sniaghtey as dy rio,' as yn Kellagh Rollee-Pollee. 'Ny keayrtyn te cho feayr dy voddagh ushag doostey 'sy voghrey as ny cassyn eck riojit gys y vangan v'ee ny soie er.'

'Eisht cre te orrin jannoo?' deie Muggyl-Wump. 'Bee ooilley yn lught-thie riojit dy dowin!'

'Cha bee, cha bee,' as yn Kellagh Rollee-Pollee. 'Son tra ta ny chied duillagyn goaill toshiaght er tuittym veih ny biljyn 'syn ouyr, foddee shiu ooilley getlagh thie gys yn Affrick marympene.'

'Ny bee bolvaneagh,' as Muggyl-Wump. 'Cha nod apagyn getlagh.'

'Foddee oo soie er my ghreeym,' as yn Kellagh Rollee-Pollee. 'Verrym shiu lhiam back, fer as fer. Nee shiu troait liorish Lhuingys Skioot Er-lheh Rollee-Pollee as cha jean eh costal ping!'

Ta ny Cribbaghyn Jannoo er ny Thootyn

As wass aynshoh ayns y thie feohdagh, ta Mnr as Bnr Thoot foast festit bun-ry-skyn rish y laare jeh'n çhamyr hoie.

'S'liats ta'n foill dy bollagh!' deie Mnr Thoot, as eh brebbal e lurgaghyn 'syn aer. 'She *uss*, dty henn chaillagh ghraney, va corlheimyragh mygeayrt as gyllagh magh "Ta shin bun-ry-skyn! Ta shin bun-ry-skyn!"

'As she *uss* va coyrlaghey dooin dy hassoo er nyn ging, dy beemayd 'syn ymmyrkey kiart, dty henn ghoayr gheayshteenagh *uss*!' ren Bnr Thoot screeaghey. 'Nish cha beemayd seyr arragh! Beemayd festit aynshoh son dy bragh!'

'Foddee dy bee *uss* festit 'sy voayl shoh son dy bragh,' as Mnr Thoot. 'Agh cha nee mish! Ta mee



son cosney veih!'

Ren Mnr Thoot lhoobey as leaystey, as çhyndaa as çheaystey, as tayrn as traastey, as seiyy as seaystey, agh chum yn ghlooie lhiantagh eh er y laare kiart cho çhionn as v'eh er chummal ny ushagyn boghtey keayrt dy row ayns Yn Villey Marroo Mooar. V'eh foast cho bun-ry-skyn as v'eh rieuu, as eh ny hassoo er e ching.

Agh cha nel king kiaddit ry-hoi shassoo er. My vees oo dty hassoo er dty ching rish traay feer liauyr, ta drogh eiyrtys jannoo ort, as hug shoh yn greain smoo er Mnr Thoot va rieuu ersyn. Lesh wheesh trimmid er veih heose, ghow yn kione echey dy ve broojit stiagh ayns e chorp.

Leah dy liooar, v'eh ass shilley dy bollagh, currit fo ny fillaghyn jeh e wannal sahllagh.

'Ta mee CRIBBEY!' ren Mnr Thoot glugyraght.

'Mish myrgeeddin!' deam Bnr Thoot.

'Cooiin lhiam! Saue mee! Cur fys er fer lhee!' dyllee Mnr Thoot. 'Ta NY CRIBBAGHYN AGGLAGH çheet orrym!'

As shen myr ve. Va NY CRIBBAGHYN AGGLAGH çheet er Bnr Thoot neesht! As yn keayrt shoh cha nee cluic v'ayn. She'n red feer v'ayn!

Ren nyn ging CRIBBEY stiagh ayns ny mwannalyn oc . . .

Eisht ghow ny mwannalyn oc toshiaght er CRIBBEY stiagh ayns nyn girp . . .

As ghow ny kirp oc toshiaght er CRIBBEY
stiagh ayns nyn lurgaghyn . . .

As ghow ny lurgaghyn oc toshiaght er
CRIBBEY stiagh ayns nyn gassyn . . .

As shiaghtin ny s'anmey, fastyr grianagh
braew dy row, haink dooinney enmyssit Fred noal
dy lhaih yn meedyr gas. Tra nagh ren peiagh
erbee fosley yn dorrys, ren Fred scrial stiagh 'sy
thie as aynshen honnick eh, er y laare jeh'n
chamyr hoie, daa vart dy henn eaddeeyn as daa
phiyr dy vraagyn as maidjey shooyl. Cha row veg
er-mayrn 'sy theihll shoh jeh Mnr as Bnr Thoot.

As ren dagh oilley pheigh, goaill stiagh Fred,
gyllagh magh . . .
'HORAA !'

